

Inzko: BiH se mora okrenuti budućnosti



Poruka visokog predstavnika Valentina Inzka:

„Bosna i Hercegovina je jučer napravila važan korak ka Evropskoj uniji, što ja svesrdno podržavam. Ovo je početak putovanja na kojem će izabrani lideri i institucije trebati pokazati volju za transformaciju ove zemlje, kako bi se BiH uskladila sa evropskim standardima. To je dug put i proces u čijem fokusu moraju biti pitanja stvarnog života.

Istovremeno, najavljeni referendum o danu RS je pokazao da neki političari u ovoj zemlji i dalje nastoje ignorirati ovu novu stvarnost gledajući još uvijek u prošlost. Pitanja kao što je referendum o 9. januaru samo onemogućavaju ovoj zemlji da kreće naprijed i usporavaju njenu dalju integraciju u evroatlantsku porodicu.

Pitanja kao što je referendum konzistentno stavljaju u drugi plan diskusiju o stvarnim problemima građana. Ljudima u Bosni i Hercegovini se uskraćuje diskusija o pitanjima koja su najbitnija – ekonomija, zdravstvo, obrazovanje i generalno bolji životni standard.

Sa stanovišta moga mandata, referendum je mnogo više od predizborne politike koja ima za cilj prikupljanje poena. On predstavlja osporavanje Ustavnog suda BiH, njegovih odluka, ustavnog okvira zemlje i vladavine prava u BiH. On nije ispitivanje javnog mnijenja, kako bi to neki željeli predstaviti.

Ustavni sud BiH je suspendovao Odluku Narodne skupštine Republike Srpske o referendumu. To je pravna činjenica. Odluke Suda se moraju poštovati. Iz tog razloga pozivam organe RS da poštuju odluku Suda i da ne održe ovaj referendum, koji nema pravnog osnova.

Pitanje državnih praznika treba se riješiti putem dijaloga i izmjene zakona i u skladu sa odlukom Suda iz novembra prošle godine, a ne putem referendumu koji predstavlja direktno kršenje odluke Ustavnog suda.

Isto tako, agresivna retorika kojom se poziva na nasilje ili silu, ili se prizivaju mračne slike rata, stvar je prošlosti i potpuno je neprihvatljiva. Stoga pozivam političke aktere na svim stranama da se suzdrže od agresivne retorike. Ta vrsta ponašanja zauvijek je ostavljena daleko u prošlosti i nema mesta u evropskoj budućnosti BiH“.